

**Furlan lenghe de Europe e Friûl (in)Storie
di miercus ai 3 di Avrîl tal Città Fiera
dôs mostris a anticipin la Fieste de Patrie dal Friûl**

Scree miercus ai 3 di Avrîl, aes 11.30 – Prin plan, Aree Verde - Città Fiera

Al torne tal Città Fiera l'apontament cu la "Fieste de Patrie dal Friûl": une iniziative rivade ae seconde edizion che e ponte a valorizâ lis origjins, la culture e la storie di autonomie dal popul furlan.

Une anticipazion de iniziative si viodarà za miercus ai 3 di Avrîl, cu la scree di un percors espositîf realizât in colaborazion cu la ARLeF e cu la Societât Filologjiche Furlane, prontât tal prin plan dal centri comerciâl. A dâ il bon acet ae cerimonie di inaugurazion al sarà Antonio Maria Bardelli, president dal Gruppo Bardelli. Adun cun lui a saran il president de ARLeF, Eros Cisilino, e Carlo Venuti, vice president pal Friûl Centrâl de Societât Filologjiche Furlane.

Une mostre uniche e darà il benvignût cun doi percors: il prin al è chel di "Furlan, lenghe de Europe". Curade di William Cisilino e promovude de ARLeF (Agenzie Regjonâl pe Lenghe Furlane), cul finanziament de Regjon Friûl – Vignesie Julie, la esposizion, che e je za stade ospitade in cetantis sedis in Europe e in Italie, e met in evidence la identitât, la storie e i caratars socioculturâi dal Friûl, esaminant in particolâr il teme de lenghe furlane e des politicis metudis in vore pe sô promozion.

Il secont percors espositîf al è promovût de Societât Filologjiche Furlane e al è dedicât a "Friûl (in)Storie", un progjet che al ponte a pandi la cognossince de identitât furlane, cuntune atenzion particolâr ai moments fundamentâi de sô storie.

Lis mostris a saran viertis al public di miercus ai 3 di Avrîl, tal orari dal centri comerciâl, al prin plan - Aree Verde.

Sabide ai 6 di Avrîl, la zornade e sarà dute dedicate a celebrâ la Fieste de Patrie tal Città Fiera. In particolâr tal dopomisdì, des 16.00 indenant, il Spazio Show Rondò al sarà animât di une vore di ativitâts: events musicâi, e tra chescj la esibizion dal rapper DJ Tubet; leturis e zûcs pai plui piçui cu la presince di Daria Miani, la amade condutore di Maman!, la trasmission TV in lenghe furlane pai fruts; cors di dissen sui "Gnognosaurs" cul fumetist "Dree" Venier e aprofondiments culturâi pai adults. La ARLeF e sarà presinte cuntun so bancut informatîf e promoziônâl, invezit la editorie pe infanzie in lenghe furlane e presenterà lis publicazions plui gnovis. Cun di plui, aes 20 di sabide ai 6 e di domenie ai 7, tal Cine Città Fiera si podarà viodi "Facchin Center", la gnove serie dai ideadôrs di "Tacons" e di "Felici ma furlans".

Udin, al 1n di Avrîl dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<